

四庫全書

史部

欽定四庫全書

文獻通考卷一百五十五

鄱陽馬端臨貴與著

兵考七

禁衛兵

周官宮正掌王宮之戒令糾禁以時比宮中之官府次

舍之衆寡

時四時比校次其人之在否官府之在宮中者若膳夫王府內宰之屬次諸吏直宿若今

部署諸廬者舍其所居寺也

為之版以待

官府次舍之版圖及其人之名籍以待比夕擊

拆而比之

莫行夜以比直宿者為其有懈怠離部署

國有故則令宿其比亦

如之

故謂災禍令宿謂衛王宮也

辨內外而時禁

分別內外人禁其非時出入

稽

其功緒糾其德行

功吏職也緒其志業

譏其出入均其稍食去其

淫怠與其奇袤之民

民宮中吏之家人也淫放濫怠懈慢奇袤譎舛非常

會其什

伍而教之道藝

五人為伍二伍為什寄宿衛之令

月終則會其稍食歲

終則會其行事

行事吏職也

宮伯掌王宮之士庶子凡在版者

鄭司農云庶子宿衛之官版名籍也以版

為之若今鄉戶籍謂之戶版謂王宮之士謂王宮中諸吏之適子也庶子其支庶也

掌其政令行

其秩叙作其徒役之事

秩祿秩也叙才等也作徒役之事天子所用

授八次

八舍之職事

衛王宮者必居四角四中於徽候便也鄭司農云庶子衛王宮在內為次在外為舍

玄謂次其宿衛所在舍其休沐之處

若邦有大事作宮衆則令之

謂王宮之士庶

子於邦之大或當選行

月終則均秩歲終則均叙以時頒其衣裘

掌其誅賞虎賁氏虎士八百人

士徒選有勇力者

掌先後王而

趨以卒伍

王出將虎賁士居前後雖羣行亦有局分

軍旅會同亦如之舍則

守王閑

舍王出所止宿處閑控桓也

王在國則守王宮

為周衛

國有大

故則守王門大喪亦如之及葬從遣車而哭適四方使

則從士大夫

虎士從使者

若道路不通有徵事則奉書以使

於四方

不通逢兵寇若泥水奉書徵師役也

旅賁氏掌執戈盾夾王車而趨左八人右八人車止則

持輪

夾王車者其下士也下士十有六人士為之帥焉

凡祭祀會同賓客則服

而趨

服而趨夾王車趨也會同賓客王亦齊服服衰冕則此士之齊服服玄端

喪記則衰葛

執戈盾

葛葛經武士尚輕

軍旅則介而趨

介被甲

司隸掌五隸之法辨其物而掌其政令

五隸謂罪隸四翟之隸也物衣

服兵器之屬

掌帥四翟之役使之皆服其邦之服執其邦之

兵守王宮與野舍之厲禁

野舍王行所止舍也厲遮衛也疏服其邦之服若東方

南方衣皮帛執刀劍西北方衣纁裘執弓矢

蠻隸在王宮者執其國之兵以守王宮在野外則守厲禁

罪隸 夷隸 貉隸其守王宮與其守厲禁者如蠻隸之事

林氏曰周廬千列設戟百重入守虎闕出陪豹尾此古人設衛所以強幹弱枝防未然而滅不軌也

昔成周宿衛之制居則宮正宮伯之衛行則虎賁氏之衛僕從之衛掌於太僕守隸之衛掌於司隸其制蓋不一矣宮正有宮之徒役宮伯有公卿大夫之士庶子以為環列腹心之任居衛之制然也虎賁氏有虎士八百人掌先後王而趨以卒伍視朝則在路門之右行衛之制然也太僕掌奉輿馬督扈從視朝則在路門之左

太僕王視朝則荷正位而退入亦如之王

出入則左馭而前驅太僕而下有小臣祭僕隸僕御僕皆屬焉又司云太僕大有太僕從者在路門

之司隸掌率夷隸執兵器服兵服以衛王之門外

朝在野外則守內列僕從守隸之衛制然也由是言之環列腹心之衛非兵衛在內而不出虎士之

衛為重兵之衛非王出亦不行四翟之衛則環衛

諸門僕從之徒則整飾騶從此宿衛之別詳矣然

虎賁綴衣無非吉士侍御僕從固非正人執劉鉞

而上戈刃者皆用冠冕之士大夫

顧命四人綦弁執戈上刃夾兩

階凡一人冕執

劉立於東堂居虎門而詔王嬖者乃率四夷之

賤隸

師氏掌以嫩詔王使其屬率四夷之隸

糾其德行稽其功緒勸

以善也掌其糾禁嚴其誅賞防以過也由是言之
腹心之衛固擇有道有德之賢而宿衛之兵亦皆
使賢士大夫為之其任嚴矣而聖人防微杜漸之
意又不止是蓋人君處內庭之時多處外庭之時
少親侍臣之意玩親大臣之意嚴今宮正宮伯之
兵衛郎衛固為太宰之屬而虎賁之虎士掌於司
馬司隸之伍隸掌於司寇皆聽命於太宰内外相

維而賢否無混淆之患事權不分而政令無下移之漸此周制之所以盡善也

漢制南軍在京城門內衛尉主之北軍在宮城門外中

尉主之

詳見兵制門

郎中令秦官掌宮殿掖門戶有丞武帝

太初元年更名光祿勳屬官有大夫郎謁者皆秦官又期門羽林皆屬焉

衛尉秦官掌宮門衛屯兵有丞景帝初更名中大夫令後元年復為衛尉屬官有公車司馬衛士旅賁三令丞

衛三丞又諸屯衛候司馬十二官皆附焉

郎掌守門戶出充車騎有議郎中郎侍郎郎中皆無員多至千人

徐氏官考曰謹按周之兵制無事則散之田畝有役則召以縣師而宿衛常養之兵則有虎賁之士八百人至六軍之徒一軍百人大司馬之屬徒三百有二十人又在虎賁之外然不常有而虎賁之祿比下士足以代耕蓋庶人在官者也漢期門千

人而秩比郎亦古虎賁之遺意歟

後漢光祿勳掌宿衛宮殿門戶典謁書郎更直執戟宿衛門戶考其德行而進退之五官中郎將五官中郎五官侍郎五官郎中凡郎官皆主更直執戟宿衛諸殿門戶出充車騎左右僕射主虎賁郎習射左右陞長主直虎賁朝會在殿中虎賁郎虎賁中郎將羽林中郎將羽林郎無員掌宿衛侍從掌選漢陽隴西安定北地上郡西河凡六郡良家子弟補

林氏曰漢制南軍衛宮衛尉主之北軍護京中尉主之南軍則有郎衛兵衛之別如三署諸郎羽林期門則皆郎衛也如衛士令丞諸屯衛候則皆兵衛也是衛也非南軍守衛之衛乎北軍則有調兵募兵之分如三輔兵卒則是調兵而衛表中尉屬官左右京輔都尉尉丞有兵卒按黃霸為京兆尹坐發騎士詣北軍調馬不適士貶秩則京輔兵卒番上北軍明矣如八校胡騎越騎則是募兵而衛八校尉皆武帝初置中壘屯騎步兵越騎長水胡騎射聲虎賁是衛也非北軍護京之衛乎此

漢人南北軍之制也朱虛入衛卒平諸呂方朔執

戟坐折董偃袁盎以中郎却慎夫人之坐日磾入

侍縛莽何羅之逆

事並見本傳

王國侯國拘不得入

漢制

王國侯國不得入宿衛龔勝為楚王常侍後三舉孝廉不得宿衛

同族犯法限不

得與

漢制同族犯法不得宿衛龔勝望之以甲科為郎後坐弟犯法不得宿衛

雖以龔

勝蕭望之之賢寧從退免則宿衛所任之人固無

愧於周耳然始以南北軍皆隸三公而太尉周勃

得入北軍以成安劉之功可也自武帝踈遠外庭

之後衛尉之職領於將軍

王莽以大將軍兼衛尉

城門之兵

領於司馬

成帝世陽阿侯王譚成都侯王商紅陽侯王音皆以大司馬特進領城門軍

往往以中朝任之而大臣皆無預焉大司馬之任

又非向時大尉之比豈知禁嚴之地大臣皆不預

聞則凡可以轉移人主之心志惑亂人主之視聽

無所不至異日之變可見耳至東漢以來又舉五

官郎將羽林虎賁以職屬大夫議郎謁者僕射以

文屬

後漢官志五官中郎將左右中郎將羽林虎賁中郎將羽林監以職屬光祿大夫大中大夫

夫中散大夫諫議大夫議郎
謁者僕射常侍謁者以文屬分屬之後政令不行

於其間而又光祿大夫不在宿直議郎不與執戟

後志自五官至羽林凡七署唯議郎與光祿大夫同不在直中餘同後志惟不在宿直

執戟之列則凡為禁衛者皆非士人之流而郎官

三省盡為諸黃門之廬耳故宦官內典門戶外與

政事

竇武說太后曰故事黃門常侍但當給事省內典門戶耳今乃使與政事而任權重子弟

布列專為貪暴

及何進誅宦者太后不聽曰中官領統禁

省自古及今漢家故事我奈何與士人共對事乎

則知士人不為郎中久矣後盡除宦者選三署郎

入守宦官之廬即此可見

何進傳

推原其故皆光武

不任三公多置黃門

光武不任三公事歸臺閣後官少府屬多置黃門

其

流禍至是也

唐有南北衙兵南衙諸衛兵是也北衙禁軍是也高祖

初起兵有元從禁軍太宗時置百騎武后時改為千騎

睿宗時增至萬騎肅宗時有供奉射生官代宗以後有

左右神策軍

並詳見兵制門

左右監門衛掌諸禁衛門籍之法左右千牛衛掌衛及供御兵仗親衛一府勳衛二府翊衛二府凡有五府每府中郎將一人左右中郎將各一人凡府中郎將掌領校尉旅師親衛之屬宿衛者而總其府事左右郎將二馬番上者以名簿上於大將軍而配以職

武德貞觀世重資蔭二品三品子補親衛二品曾孫三品孫四品子職事官五品子若孫勳官三品以上有封及國公子補勳衛及率府親衛四品孫五品及

上柱國子補翊衛及率府勳衛勳官二品及縣男以上子若孫補諸衛及率府翊衛王府執仗親事執乘親事每月番上者數千人宿衛內廡及城門給廩食執扇三衛三百人擇少壯肩膊齊儀容整美者本衛印臂送殿中省肄習仗下每番三衛一人為太僕寺引輅其後入官路艱三衛非權勢子弟輒退番柱國子有白首不得進者流外雖鄙不數年給祿廩故三衛並賤人罕趨之

左右衛上將軍各一人大將軍各一人將軍各二人掌
宮禁宿衛凡五府及外府皆總制焉凡五府三衛及折
衝府驍騎番上受其名簿而配以職

左右衛左右驍騎左右武衛左右威衛左右領軍左右
金吾左右監門左右千牛衛凡十六 左右千牛衛掌
侍從及僕御器仗以千牛備身左右執弓箭宿衛以主
仗守戎器 折衝都尉掌領屬備宿衛師役則總戎具
資點習以三百人為團一校尉領之

十六衛每衛有上將軍有大將軍有將軍自左右衛至領軍並掌宮禁宿衛金吾掌宮中京城警監門掌諸門禁衛千牛掌侍衛凡五府外府之番上者十二衛受其名簿而配以職除監門千牛凡左右四衛不領故但十二衛五府謂親勳翊三衛外府折衝府也五府惟左右衛兼領之餘但翊衛二府而已

林氏曰唐制有八衛各分左右自左右以至千牛皆典扈從是故宮禁宿衛是統是司內廂儀仗是

臨是職者左右衛也皇城四面宮城內外諸門置
兵分助其役者驍騎也正衙朝會釐鎧旅卒兩廂
列仗唱警應蹕者武衛也正殿之前隊立於階長
樂永安隊列於廡者威衛也皇城之四面宮苑之
城門則職於領軍京城烽堠之宜南衙番上之數
則職於金吾禁衛名籍器仗出入則職於監門僕
御兵仗宿衛弓箭則職於千牛此唐人十六衛之
制也張延師之謹畏至三十年未嘗有過

唐職林
張延師

為左衛大將軍性謹畏典羽林三十年未嘗有過

阿史那忠之清謹至四

十八年無有纖隙

忠性清謹為右驍騎大將軍宿衛四十八年無纖隙時人比之

金日磾 麗玉久典宿衛習知制度

玉久宿衛習知朝廷制度高祖顧諸

將多不閑儀檢故授玉領軍武衛一大將軍使眾觀以為法

段志元衛章武門

夜不示詔

段志元為左驍騎大將軍文德皇后之葬勒兵衛章武門太宗夜遣使至志元

拒曰軍門不夜開使者示以手詔志元曰夜不能辨比旦帝嘆曰真將軍也

則宿衛所

任之人亦無愧於周然始以大臣兼領宿衛使文

皇有甘寢之安可也

元微之行子季友右羽林將軍制曰分八舍之眾寡均一

庚之勞逸皆將軍之力也是以李大亮上直禁中而文皇甘寢則心腹爪牙之任不細矣時李大亮以冬自六軍禁衛皆用市人其選始輕天寶之後衛佐悉以官兼假人為童奴京師人耻之至相屬祿山吐蕃之變辱必曰侍官而六軍宿衛皆市人

神策禁軍外入赴難國家遂以倚重悉命中人主

之其勢益橫

兵至上元中以北衙軍使衛伯玉為神策軍節度使鎮陝州中使魚朝恩

為觀軍容使監其軍祿山反時伯玉以磨礪門軍赴難即神策軍也其後吐蕃入寇朝恩又以神策軍屯苑自是復益分為左右廂大歷四年請自是以京兆之好時鳳翔之麟游普閏皆隸神策

南衙日輕北衙日重矣夫所謂禁軍者蓋太宗舉

義兵起太原已定天下悉罷還歸而願留宿衛者

三萬人給以渭北腴田號曰元從禁軍本為兵立

制非為制置兵

見唐兵志詳已具兵制門

其後左右羽林龍武

神武及神策神威而總名北衙者豈太宗初制哉

唐兵志載詳已具兵制門

且唐之十六衛已備漢人南北軍之

制以衛尉護南軍以金吾巡北軍今十六衛已有

金吾將軍掌京城巡警是北軍已寓其間觀白集

羽林衛將軍之制所謂國家設十六衛猶漢之有

南北軍其知之矣

白集王元輔授左羽林衛將軍制國家設十六衛猶漢之有南

北軍而左右羽林尤稱親重

而其元從禁軍亦猶官制員外之

置初非禁衛正兵也今以禁軍為北衙衛兵為南

衙以備漢制豈不過歟北衙既橫之後外庭諸臣

莫之誰何蕭復言之而不見聽

蕭復言艱難以來始用宦者監軍權

望太重是曹政可委宮掖事

高元裕言之而不及

用

本傳敬宗視朝不時決事禁中宦寺恣放大臣不得進見元裕諫曰西頭勢乃重南衙樞密之

權過宰相帝雖悟而不能用

惜夫推原其故皆外臣不預禁軍

專歸宦者其為患至是也噫漢不以中朝屬外朝

而使閹宦宿直卒成何進之亂

見進本傳

唐不以北衙

隸南衙亦使宦官典兵反致王叔文之亂

見唐兵志

其

視周人以禁衛屬冢宰之意又何止天淵哉

梁太祖始置侍衛馬步軍

開平元年改左右長直為左右龍虎軍左右內衛為左右羽林軍左右監銳夾馬突將為左右神武軍左右親隨軍將馬軍為左右龍驤軍其年九月置左右天興左

右廣勝軍仍以親王為軍使

二年十月置左右神捷軍十二月改左右天武為左右
龍虎軍左右龍虎為左右天武軍左右天威為左右羽
林軍左右羽林為左右天威軍左右英武為左右神武
軍左右神武為左右英武軍

前朝置龍虎等六軍謂之
衛士至是以天威天武英

武等六軍易其軍
號而任勲舊焉

後唐長興三年三月勅衛軍神威雄威及魏府廣捷以
下指揮宜改為左右羽林置四十指揮每十指揮立為

一軍每一軍置都指揮使一人兼分為左右廂應順元年三月改左右羽林四十指揮為嚴衛左右軍龍武神武四十指揮為捧聖左右軍清泰元年六月改捧聖馬軍為彰聖左右軍嚴衛步軍為寧衛左右軍

晉天福六年改拱宸威和內直軍並為興順至八月改奉德兩軍為護聖左右軍周廣順元年四月改侍衛馬軍曰龍捷左右軍步軍曰虎捷左右軍

顯德元年詔汰簡諸軍取武藝超絕者為殿前諸班見

門制

宋太祖皇帝建隆初詔殿前侍衛二司各閱所掌兵練其驍勇者為上軍老弱者為剡員又詔諸州長吏選所部兵送都下以補禁旅之闕

詳見兵制門

禁軍殿前侍衛司

分領之殿前司領騎兵之額三十七步兵之額二十六侍衛司領騎兵之額三十五步兵之額八十三御前忠佐軍頭司領步騎之額四皇城司領步兵之額二左右

驍院領騎兵之額二廂軍亦內屬侍衛司

見郡國門

翼京畿廣捷虎翼効忠陝西河東清邊弩手京西江淮
荆湖歸遠總百餘營

康定初趙元昊反西邊用師詔募神捷兵既而易名萬
勝為二十營所募多雜市井之人選便不足以備戰守
是時禁兵多戍陝西陝西並邊土兵雖不及等然驍勇
善戰而以京師所遣戍為東兵東兵雖魁碩大率不能
辛苦而推鋒陷陣非其所長又北兵戍川陝嶺嶠荆湖

間多不便習水土故建議者欲益募土兵為就糧於是
增置陝西蕃落保捷定功河北雲翼有馬勁勇陝西河
北振武河北京東武衛陝西京西壯勇延州青澗登州
澄海弩手京畿近郡亦增募龍騎廣勇廣捷虎翼步關
步武復升河北招收無敵聽予馬陝西制勝并州充戎
騎射麟州飛騎府州威遠秦州建威慶州有馬安塞保
州威遠安肅軍忠銳嵐府州建安登州平海皆為禁兵
蓋用外馬步凡增數百營

揀選之制有自廂軍升禁軍禁軍升上軍上軍升班
直升上軍及班直者皆臨軒親閱自非才勇絕羣不
以應召募餘皆自下選補仁宗嘗詔樞密院次禁軍
選補之法凡入上四軍者捧日天武弓以九斗龍衛
神衛弓以七斗天武弩以二石七斗神衛弩以二石
三斗為中格恩翼員僚直驍捷軍士選中四軍則不
復閱試自餘招揀中選者並引對凡員僚直闕人則
以選中上軍及龍衛等樣弓射七斗合格者充仍許

如龍衛例選補班直凡選禁軍自奉錢三百以上弓射一石五斗弩蹠三石五斗等樣及龍衛者並親閱以隸龍衛神衛凡騎御馬直闕小底則閱拱聖驍騎少壯善射者充凡弓手內殿直以下選補殿前指揮使射一石五斗御龍弓箭直選補御龍直御龍骨朶子直東西班帶甲殿侍選補長入祗候御龍諸直將虞候選補十將射皆一石四斗東西班散直選補內殿直捧日員僚直天武神衛龍衛親從選補諸班直

御龍骨朶子直弓箭直將虞候選補十將御龍諸直
長行選補將虞候射皆一石三斗員僚龍御騎御馬
直小底選補散直射皆一石二斗

神宗初揀罷禁軍之不如法者入并廢諸軍營

詳見兵制門

熙寧之籍天下禁軍凡五十六萬八千六百八十八人
元豐之籍六十一萬二千二百四十三人

徽宗宣和五年尚書省言昨臣僚言古制六軍所以備
王之爪牙而羽林又禁衛之總名也今臣僚使令兵卒

所居營分曰六軍而復有左右衛林之名稱謂失當詔令措置今欲將揀中六軍并六軍指揮並改為廣効內揀中六軍作第一指揮左龍武第二左羽林第三左神武第四右龍武第五右羽林第六右神武第七從之

高宗建炎元年五月始置御營司

以黃潛善汪伯彥兼使副國初以來殿前侍御馬步司三衛禁旅合十餘萬人自高俅得用軍政遂弛靖康末衛士僅三萬人及城破所存無幾至是殿前司

以左言權領而侍衛二司猶在東京禁衛寡弱諸將
楊惟忠王淵韓世忠以河北兵劉光世以陝西兵張
俊苗傅等以帥府及降盜兵皆在行朝不相統一於
是始置御營司以總齊軍中之政令因其所部為五
軍以淵為使司都總制世忠俊傅等並為統制官又命
光世提舉使同一行事務潛善伯彥別置親兵各千
人優其廩賜議者非之

四年三省言本府分兩府而兵權盡付樞密院今又置

御營司是政出於三也乃詔御營司併歸樞密院紹興四年詔改御前五軍為神武御營五軍為神武副軍並隸樞密院既而左僕射趙鼎言神武乃北齊舊號且督府軍馬今撥隸三衙乃廢神武中軍隸殿前司以楊沂中主管殿司公事又以都督府兵分隸之於是殿司之兵柄始一

建炎以來朝野雜記國朝舊制殿前侍衛馬步三衙禁旅合十餘萬人宣和間僅存三萬而已京城之破

多死於敵建炎元年秋騎帥郭仲荀自東京部禁旅
至南京已而還為副留守三年秋仲荀以敵過京城
糧儲告竭遂率餘兵赴行在其冬上將航海避狄而
衛士張寶等不欲行因呂元直入朝率衆圍之出語
不遜上怒誅十七人於明州市除行門外盡廢其班
明年春上至台州兵衛寡弱惟中軍統制官辛永宗
有衆數千而呂元直之親軍將姚端衆獨盛上皆優
遇四月上還會稽乃選中軍五百人入直殿巖悉烏

合之衆時趙元鎮初秉政因為上言祖宗於兵政最
為留意今諸將各總衆兵不隸三衙則兵政已壞獨
衛兵髣髴舊制亦掃蕩不存是因咽而廢食也上悟
尋復舊制然衛兵不滿三千識者病其單弱數以為
言紹興二年秋詔三衙措置已而上謂輔臣曰一衛
士所給可贍三四兵朕命楊沂中治神武中軍此皆
宿衛兵也遂命沂中兼提舉宿衛親兵五年冬廢神
武中軍隸殿前司以沂中主管殿前司公事

十二月
庚子

又以都督府兵分隸三衙

是月庚戌

七年夏復合馬司餘

軍及八字軍為六軍十二將命劉信叔主之

四月丙申解

承宣潛典步軍如故自是三衙始復矣

神武中軍舊止三部自楊存中職殿巖始增為五軍
又置護聖踏白選鋒神奕神勇馬步凡十二軍時江
海盜作因分制諸軍控制之如泉之左翼贛之右翼
循之推鋒明之水軍皆隸殿司總七萬人由是殿司
兵籍為天下冠

初御營五軍之外又置御前三軍尋又改為神武五軍紹興元年又改為行營四護軍張俊稱前軍韓世忠稱後軍岳飛稱左軍劉光世稱右軍楊沂中中軍以隸殿前司而吳玠軍如故七年光世軍叛降偽齊於是川陝軍更以右護軍為號十一年三宣撫罷乃改稱某州駐劄御前諸軍十八年川陝諸軍亦如之其軍皆不隸三衙由是御前軍又在禁軍之外矣

二十四年殿前都指揮使楊存中劄子乞遵依祖宗法

在京所管捧日天武拱聖驍勝騎勝寧朔神騎神勇宣武
虎翼廣勇諸指揮禁軍內捧日天武依條陞揀扈衛諸
班直拱聖神勇以下陞揀捧日天武除逃亡事故外有
一千九百人差使日增人數日虧欲乞於今年分定月
分內招一千人請給例物並依先招人體例詔依二十
七年十二月樞密院言殿前都指揮使楊存中劄子準
旨三衙所招軍兵効用權行住招自紹興二十六年見
闕四千四十六人及三十七年揀汰三千四十四人見

闕二千一百四十人并已揀汰五百四十人共闕六千七百二十六人若不招填兵數日有虧損緣近來游手人陳乞情願投軍稍多望令本司自來年正月一日為始依舊招募情願投軍少壯百姓刺充効用勝捷吐渾雄威填額使換依例支破請給所招係填名調即不曾添請給照依今三衙依分定月分招填

孝宗隆興三年主管步軍司公事郭振言本司在京日所管軍額計三萬九千五百人今來行在見管止一千

二百一十九人緣諸處非之差使應副不行乞招一千七百八十人通作三千人為額刺充神衛虎翼飛山床子弩雄武等指揮其請給例物等依則例行詔特依

乾道四年樞密院言殿前司步軍司內有官人子弟多願投充効用其間不及等杖二三寸却有膂力强壯之人詔今後令逐司遇有闕額除及等杖外若低一二寸令射八斗力弓低三寸令射九斗力弓委承旨司審驗強壯即行指試

六年主管侍衛馬軍司公事李顯忠言本司諸軍兵將
官有關自來遴選衆所推服之人不以次序申乞陞差
近年以來須自訓練官差充準備將及二年陞副將副
將及二年陞正將正將及三年陞統領再及三年陞統
制官切恐無以激勸士氣乞今後兵將官有關不以年
限許令本司銓量人材膽勇過人能服衆者保明申朝
廷取旨差填從之

時處禁旅廷補
本末見軍制門

七年虞允文乞移馬司於建康以為出師之漸乃以李

顯忠為都指揮使統馬軍屯馬元額三萬人

乾道初殿步馬司兵馬權以七萬三千人為額二年降旨馬司以三萬人步司以二萬七千人

慶元二年殿前都指揮使郭杲言南渡以來捧日天武已下權以三千人為額今諸班直見管一千七百五十人并新揀中人共二千二百五十二人請立為定額詔依

大抵此一軍乃高宗所收諸將之部曲其殿前司則

辛永宗諸軍部曲而益以他軍也馬軍司則合王彥
部曲而益以解潛劉錡田盛之兵步軍司則奉王彥
所部之兵其軍校之制有殿前司都指揮使副都指
揮使都虞候各一人諸班有都虞候都虞候指揮使
都知副都知押班御龍諸班有四直都虞候奉直各
有都虞候指揮使都頭十將將虞候馬步軍有捧日
四廂都指揮使管舊城裏左廂煙大及殿前司馬軍天武四廂都指揮
使管舊城裏右廂煙大及殿前司馬軍捧日天武左右廂各有都指揮

使每軍有都指揮使都虞候每指揮有指揮使副指

揮使每都有軍使

步軍四都頭

副兵馬使

副軍四副都頭

十將虞

候承局押官

其下有統制官領官同統領正將副將同副將准備將同准備將之分推之侍

衛司廂禁軍皆如之

中興制自殿前左右班御龍直骨朵直內

殿直吊箭直弩直散員散指揮散都頭散祗候金槍

銀槍班茶酒新班西一班殿侍東五班散直班二十

四班為上軍

文獻通考卷一百五十五

欽定四庫全書

史部

文獻通考卷一百五十六

詳校官內閣學士_臣瑞保

編修_臣程嘉謨覆勘

覆校官庶吉士_臣陳墉

校對官主事_臣龔敬身

謄錄監生_臣沈希曾

欽定四庫全書

文獻通考卷一百五十六

鄱陽馬端臨貴與著

兵考八

郡國兵

鄉兵

周制大國三軍次國二軍小國一軍

詳見兵制門

秦始皇并天下列為三十六郡郡置材官

漢列郡王國侯國三者其兵不殊郡有都尉佐太守典

武職甲卒其在王國者則以內史比郡守中尉比都尉侯國亦有相秩比天子令長其郡國之兵必有虎符而後可發

齊王欲發兵誅諸呂魏勃曰王欲發兵非有漢虎符驗也

武帝建元三年東甌告急上曰吾新即位不欲出虎符召兵郡國乃遣嚴助以節發會稽兵會稽守欲距法不為發助乃斬一司馬諭指意遂發兵浮海救東

甌

七國敗弓高侯詰膠西王卬曰未有詔虎符擅發兵
王其自圖之卬遂自殺至公孫戎奴為上黨太守發
兵不以聞免

高祖命天下選能引閼蹶張材力武猛者以為輕車騎
士材官樓船常以秋後講肄課試各有員數平地用車
騎山阻用材官水泉用樓船

光武以幽冀兵克定天下始於黎陽立營領兵騎常千

人以謁者監之號黎陽兵

建武六年詔罷郡國都尉并職太守無都試之法

七年罷天下輕車騎士材官樓船及軍假吏悉還民伍

詳見兵制門

晉武帝大封同姓大國三軍兵五千人次國二軍兵三千人小國一軍兵千五百人

太康元年既平吳詔悉去州郡兵大郡置武吏百人小郡五十人

唐制高祖武德初始置軍府析關中為十二道以驃騎車騎兩將軍領之

太宗貞觀十年更號統軍為折衝都尉別將為果毅都尉諸府總曰折衝府凡天下十道關中置府一百七十
三河南置府六十二河東道置府百三十九河北道置
府十四山南道置府凡十隴右道置府二十九淮南道
置府凡六江南道置府凡二劍南道置府凡十嶺南道
置府凡三共十道置府五百六十四皆有名號而關中

府皆以隸諸衛凡府三等兵千二百人為上為中八百人為下府置折衝都尉一人左右果毅都尉各一人長史兵曹別將各一人校尉六人士以三百人為團團有校尉五十人為隊隊有正十人為火火有長

高宗武后以來府衛之法寢壞變而為彊騎彊騎變而方鎮之兵熾矣

詳見兵制門

林氏曰唐之府兵折衝都尉雖遙隸於諸衛軍城守捉實散在於諸道每歲季冬折衝將率兵馬之

在府者置左右校習戰陣之儀步隊騎隊之有其
制擊鉦伐鼓之有其節國無不習之兵然府兵六
百三十四所以三百六十有一在關中固為重本
計而諸道二百有餘分布錯置亦為防外設唐初
相制之意非不善也夫何更代法廢諸府之籍不
補折衝之將不遷見兵制及范陽之變所過州縣望
風瓦解如入無人之境外兵蓋失於不補耳迨至
諸鎮之兵共起討賊其後安史繼亂中國雲擾肅

宗命李光弼等討之號九節度之師大盜既滅而
武夫戰卒以功起行陣者皆除節度由是方鎮相
望於內地朝廷不能制而甘為姑息之政是以京
師有變藩鎮亦驅兵而至朱李之徒相繼犯闕唐
祚遂以瓜裂此亦矯重外兵之失也嗟夫輕則盜
賊以乘隙重則牧鎮以據兵為國者安可不權其
勢歟

田承嗣鎮魏博選募六州驍勇之士五千人為牙軍

厚其給賜以自衛為腹心自是父子相繼親黨膠固
歲久益驕橫小不如意輒族舊帥而易之自史憲誠
以來皆立於其手天雄節度使羅紹威心惡之力不
能制朱全忠之圍鳳翔也紹威遣軍將楊利言密以
情告全忠欲借其兵以誅之全忠以事方急未暇如
其請陰許之及李公佐作亂紹威益懼復遣牙將臧
延範趣全忠全忠乃發河南諸鎮兵七萬遣其將李
思安將之會魏鎮兵屯深州樂城聲言擊滄州討其

納李公佺也會全忠女適紹威子廷規者卒全忠遣客將馬嗣勲實甲兵於橐中選長直兵千人為擔夫帥之入魏詐云會葬全忠自以大軍繼其後云赴行營牙軍皆不之疑庚午紹威潛遣人入庫斷弓弦甲礮是夕紹威帥其奴客數百與嗣勲合擊牙軍牙軍欲戰而弓甲皆不可用遂闔營殪之凡八千家嬰孺無遺

宋太祖皇帝詔諸州長吏選所部兵送都下以補禁旅

之闕

詳見兵制門

宋制軍有禁軍廂軍二等國初盡選驍勇部送闕下以補禁衛餘留本城其後開拓土宇申嚴紀律闕防要害皆設屯戍漕輓營繕力役之任悉用士伍自乾德至於乾興召募增置名額漸廣凡所規畫盡為節制畿甸之內蕃服雖大不以加也邊防之地堡障雖小必有備也廂軍者諸州之鎮兵也各隸其州之本城專以給役內總於侍衛司而尚書兵部掌其政令一軍之額有分隸

數州者或一州之管兼屯數軍其教閱者始號廂禁軍後皆以為丁禁軍其給使於諸司者亦各以其事役屬

焉 禁軍月俸五百以上者皆日閱習武技其三百以

下有閱習或充役者戍川廣者不習其後詔諸道騎兵

頗為長吏之所役使失於教習自今止之禁軍殿前侍

衛司分領

見禁衛門

廂軍總諸州騎兵之額四十八步兵之

額百八十三又在京諸司之軍額有五分給畜牧繕修

之役隸宣徽院州有屯兵者官給錢宴犒將校謂之旬

設 凡諸州置馬步軍都指揮使副都指揮使都虞候
馬軍有都指揮使副都指揮使都虞候步軍亦如之馬

步軍諸指揮各有指揮使副指揮使

開寶中嘗置軍教練使在指揮使上

後廢

每都有軍使副兵馬使都頭副都頭廂軍頭十將將

虞候承局押官置都監監押以領之歲時簡練馬下州
及軍監但有牢城兵則軍校之職隨宜裁置其諸州都
監監押止得典司軍旅及捕逐冠賊不許關預州縣政
事屯駐禁軍將校凡遙帶郡令以客禮見長吏餘如統

攝之儀

其駐泊就糧禁軍將校見長吏如屯駐將校之禮

止齋陳氏曰自建隆二年以諸郡本城共百役

淳化

四年十一月宣應馬遞鋪兵士並於本城諸指揮
內輪差候及二年替咸平三年九月宣諸路本城
兵士差直馬遞鋪祇應內有搬家者今後並五年
一替不搬家者三年一替嘉祐元年九月二十七
日定州都著禮奏在城廂軍逐年抽上黃河執役
并修葺倉營城池迎送官員擔擎往來又自官中
不招添以來人數轉少今來一名當著教人色欲
權宜勾抽馬遞鋪閑劇人赴州驅使見得自淳化
至嘉祐或更戍他郡又按咸平三年二月二十七
猶如此日宣諸州本城兵士差在州
陝駐泊遇郊賞如係屯駐駐泊及巡檢下即與同
帶甲例逐人三貫歸營却同不帶例天禧四年十

月二十三日永州團練使錢惟濟奏諸州兵士差往邊上守把及於都同巡檢下捉賊及諸色役多是別指揮節級軍員部轄或有違犯未有明文元豐四年七月福建路閩邱奏巡檢下土兵並是諸雜撥諸指揮廂禁軍或屯駐客軍不諳本路山川道路差到年歲間稍能辨認道路人物又却替移元豐八年八月宣福建路東南第十將下部軍六指揮年滿令差使臣往抽衡州威果四百五十九人道州威果四百五十一人辰州雄畧三百十八人鄂州懷恩三百五十一人鼎州歸遠二百六十六人廣德軍教閤忠節二百六十二人替不但以逸民閤歸營見得咸平元豐猶更戍如此

戶也所以勞苦其身違離其妻子使習於南北風土之異而不得坐食於本營蓋勞之則易使散之

則易養此藝祖神謀也三司禁旅就糧州郡亦不

得常坐食於京師

按祥符編勅淳化四年十二月二十六日宣應差發就糧禁軍

欲往軍前屯駐駐泊巡檢守把處及歸學指揮收管如及二三十人便須聞奏乞差使臣管押景德

四年知福州陳象輿奏駐泊許州騎射指揮節級兵士多缺命抵一家三百二十疋今揀選冒知高

大依與餽養候替換日赴京師送納皇祐三年宣差在京步軍虎翼第四指揮使唐興下五百二十

二人宋興下三百二十人至福州提轄司如轄下州軍缺人防守緩急捉捕盜賊去處便仰量酌差

撥應付以上指揮甚多不可悉載

自列郡各置禁軍於是嚴差出

占破之令

慶歷三年十月十四日宣置定穀指揮即不得差出及諸般占役五年七月二

十七日宣定殺兵士不得差上綱及出外諸般功役其知州以下不得影占一名嘉祐四年八月宣置就糧禁軍以威果為額七年十月九日呂誨奏諸路提轉宣諭州軍存留兵士不得差出防護借請諸般虛占人數治平四年五月七日勅主兵而之官冗占雜使法外重斷仍令提轉覺察申奏而

壯城

元豐三年四月十二日密院劄子於廂軍內差壯城兵士大城五十人崇寧五年五月置

壯城指揮

作院

熙寧元年置作院指揮

各置指揮由是在軍禁旅

無就糧者

熙寧五年宣諸路教閱廂軍備員使喚不得奏差

禁軍在城防

托而廂軍亦升為禁軍不復戍役矣養兵之費徧天下北人犯關無或能發一矢者以不守藝祖舊

章也

開寶八年發渭州平源藩源二縣民治城壕因立為保
毅軍弓箭手分鎮戍寨能自置馬者免役逃死以親屬

代蓋因周廣順之制

周廣順中點秦州
稅戶充保毅軍

止齋陳氏曰此所謂義軍也藝祖有志於民兵矣
咸平五年始置營升為禁軍其後寢有點差之令

而前朝名臣多言不便

咸平五年五月命使臣分
往邠寧環慶涇原渭隴鄜

延等州於保安保毅義軍內與逐處官吏選取有
力者二萬人各本州置營升為禁軍號曰振武指

揮既而帝曰邊防缺兵朝廷須為制置蓋不得已也候邊鄙大寧即可銷弭咸平五年嘗於曹單宋毫汝潁間點集強壯五七萬人始降宣命只今在本城防守及至秦關都數即便押赴京師見侍御史知雜事田錫奏康定元年差吳遵路等於河東點差強壯共一十四萬三千餘人多而不精頗防奪農事見河東轉運使文彥博奏慶歷元年宣差朝臣往陝西河東京東西路點集強壯弓手願充軍人分配宣毅保捷指揮謹列不便事件如左見知諫院張方平奏治平元年十一月差提點刑獄陳安石於本路人戶三丁之內刺一萬為充勇如果若此大為非便自寶元慶歷之間因趙元昊叛遂於三路人戶不問貧富等第但有三丁充鄉弓手及強壯尋將陝西一路鄉弓手盡刺面充保捷指揮云云

韓琦為相嘗身歷西事留意兵政刺陝

凡六奏

西義勇知諫院司馬光至六疏爭之不聽已而新
法行熙寧六年十月遂罷强壮弓箭手而行保甲
海內騷然要之皆以刺配為軍失祖宗本意而非
民兵不可復以臣愚見條約弓箭社如龐籍蘇軾
則人情不擾而邊備修矣此今日所當講也

仁宗皇祐中京東安撫使富弼上言臣頃因河北水災
農民流入京東者三十餘萬臣既憫其濱死又防其為
盜遂募伉健者以為廂兵既而選尤壯者得九指揮教

以武技已類禁軍今止用廂兵俸廩而得禁軍之用可使効死戰鬪而無驕橫難制之患此當世大利也詔以騎兵為教閱騎射威邊步兵為教閱壯武威勇分置青萊淄徐沂密淮陽七州軍征役同禁軍初弼請刺教閱字帝不許止加於軍額嘉祐四年復詔西路於鄆濮齊兗單州置步兵指揮六如東路法於是東南州軍多置教閱廂軍皆以威勇忠果壯武為號訓練肆如禁軍免其他役

英宗治平初遣使分募河北河東陝西京東民為本城
兵遇就糧禁軍闕即選補又陝西州軍悉置壯城如河
北以備繕完城壘之役蓋景祐中本城四十三萬八千
逮治平三年乃五十萬矣總諸州本城教閱騎軍之額
四步軍之額六不教閱騎軍之額三十有五步軍之額
一百九十有五

河北河東神銳忠勇強壯 仁宗時神銳忠勇廢已久
而忠順保毅僅有存者康定初詔河北河東添籍強壯

河北凡二十九萬三千河東十四萬四千皆以時訓練
自夏人逆命王師屢衄正兵不足乃籍陝西之民三丁
選一以為鄉弓手未幾刺充保捷軍為指揮一百八十
五分戍邊州及西師罷多揀放為民慶歷二年籍河北
強壯得二十九萬五千揀十之七為義勇盡抄民丁增
廣其數河東亦揀刺如河北法其後議者論義勇為河
北伏兵以時講習無待儲廩得古者寓兵於農之意惜
其束於列郡遺其大用只以為城守之備誠能令河北

邢冀二州分東西兩路命二郡守臣分領以時閱習寇至即兩路義勇翔集赴援使其腹背受敵則是河北三十餘所常伏銳兵羣胡何恃不恐朝廷下其議河北帥臣李昭亮等議曰昔唐澤潞留後李抱真籍戶丁男三選其一農隙則分曹角射歲終都試以示賞罰三年皆善射舉部內得勁卒二萬既無廩費府庫益實乃繕甲兵為戰具遂雄視山東是時天下稱昭義步兵冠於諸軍此則近代之顯效而或者謂民兵祇可城守難備戰

陣誠非通論也但當無事時便分義勇為兩路置官統領以張用兵之勢外使敵人疑而生謀內亦搖動衆心恐非寓兵之術也姑令所在點集訓練三二年間武藝稍精漸習行陣遇有警得將臣如抱真者統馭制其陣隊示以賞罰何戰敵不可哉至於部分布列量敵應機遣用之地繫於臨時便宜亦難預圖况河北河東皆邊胡之地自置義勇州縣以時按閱耳目已熟行固無疑詔如所議歲教閱以新舊籍并闕數聞熙寧七年轉運

判官黃好謙言河東強壯前已寢廢其募於河北者舊給唐泊河游之田力不足以耕重苦番教應募者寡請

罷強壯以田募民耕毋過兩頃蠲其賦以為保甲從之

陝西保毅 周廣順置開寶八年因之

詳見前

咸平初秦

州極邊上置千人分番戍守月給米冬賜衣五年點陝西近邊丁壯充保毅凡得萬六千人給資糧與正兵分戍邊郡慶歷初悉刺為保捷軍唯秦州增置及三千人環慶保安亦各置籍時諸州總六千五百十八人為指

揮三十一皇祐五年涇原都總管程勘上言陝西保毅近歲止給役州縣無復責以武技自點刺為保捷軍而家猶不免保毅之籍或折賣田產而所售之家以分數助役今秦州僅三千人久廢農業請罷遣詔自今敢私役者計傭坐之其後詔買保毅田承名額者悉揀刺以為義勇熙寧四年詔廢其軍

河北忠順 自太宗朝以瀛鄭雄霸州乾寧順安保定軍家戶置凡三千人自陶河至泥姑海口九百里為二

十六寨一百二十六鋪沿界河分番巡徼隸緣邊戰棹
巡寨司自十月悉上人給糧二升至二月輪半營農慶
歷七年夏竦建議與正兵參戍其後以多補亡者權放
業農俟歲豐如故自後不復補

河北陝西強人 咸平四年募河北民諳契丹道路勇
銳可為間伺者充強人置都頭指揮使無事散處田野
遇敵入寇追集給器甲口糧食錢遣出塞偷斫賊壘能
斬首級奪馬者如賞格擄獲財富皆畀之慶歷二年環

州亦募湟手背自備戎械并馬置押官甲頭隊長戶四等以下免役上番防守月給俸廩三年涇原路被邊城寨悉置環慶二州復有寨戶天禧慶歷間募置番戍為巡徼斥堠日給糧人賦田八十畝能自備馬者益賦田四十畝遇防秋官給器甲下番隨軍訓練為指揮六河北河東強壯自五代時瀛霸諸州已有之咸平三年詔河北家二丁三丁籍一四丁五丁籍二六丁七丁籍三八丁以上籍四為強壯五百人為指揮置指揮使

百人為都置正副都頭二人節級四人所在置籍擇善
騎射者第補校長聽自置馬勝甲者蠲其戶役五年募
其勇敢團結附大軍為柵官給鎧甲景德元年遣使分
詣河北河東集強壯借庫兵給糧訓練非緣邊即分番
迭教遇敵入境悉集守城敵退放營農至康定初州縣
不復閱習多亡其籍乃詔二路選補增廣為伍保迭糾
游手不業農及作姦者二十五人為團置押官四團為
都置正副都頭各一人五都為指揮置指揮使各以階

級伏事年二十係籍六十免取家人或他戶代之歲正月縣以籍上州州以籍奏兵部按舉不如法者慶歷二年悉揀以為義勇不預者釋之而存其籍以備守葺城池而強壯自此寢廢矣

河東陝西弓箭手 周廣順初鎮州諸縣十戶取材勇者一人為之餘九戶資以器甲芻糧建隆二年詔釋之凡一千四百餘人景德二年鎮戎軍曹瑋言有邊民應募為弓箭手者請給以閒田蠲其徭賦有警可參正兵

為前鋒而官無資糧戎械之費詔人給田二頃出甲士一人及三頃者出戰馬一疋設堡戍列部伍補軍置巡檢以統之其後鄜延環慶涇原并河東州軍亦各募置慶歷中諸路總三萬二千四百七十四人為指揮一百九十二至和二年韓琦奏昔潘美患契丹數入寇遂驅旁邊耕民內徙苟免一時失備之咎其後契丹講和因循不復許人復業遂名禁地歲久為戎人侵耕漸失疆界今代州寧化軍有禁地萬頃請如草城川募弓箭手

可得四千餘人詔如其請條視山坡川原地均給人二頃其租秋輸川地畝五升均原地畝三升毋折變科徭仍指揮即擇山險為社以居止備征防毋得擅役先是麟府豐州亦以閑田募置人給屋貸口糧二石而德順軍靜邊寨壕外弓箭手尤為勁勇夏人利其地數來爭朝廷為築堡戍守至治平末河東七州軍弓箭手總七千五百人陝西十州軍并寨戶總四萬六千三百人熙寧二年兵部上河東七郡舊籍七千五百今籍七千陝

西十郡并寨戶舊籍四萬六千三百唯秦鳳有寨戶三年秦鳳路經畧使李師中言前年築熟羊等堡募蕃部獻地置弓箭手迄今三年所募非良民初未嘗團結訓練竭力田事今當置屯列堡為戰守計置屯之法百人為屯授田於旁寨置將校領農事休即教武技其牛具農器旗鼓之屬並官予置堡之法諸屯併力自近及遠築為堡以備寇至寇退則悉出掩擊從之五年趙高為鄜延括地萬五千九百頃募漢番弓箭手四千九百人

帝嘉尚能省募兵之費有詔褒賞六年詔熙河路以公
田募弓箭手其旁塞民強勇願自占田出租賦聯保伍
或義勇願應募或民戶願受番部地者聽中書條例司
乞五路弓箭手寨戶除防托巡警及緩急邊事許差發
外若修城諸役即申經畧司如敢擅差及科配和催並
論違制罪從之八年環慶路經畧使范純仁言舊陝西
勅弓箭手百姓不許典買租賃蕃部田土臣今體訪環
慶諸州城寨熟戶昨因災傷多以田土典賣與番部竊

恐既賣盡田土則無顧戀之心詔依舊勅元豐四年涇
原路經畧司言本路弓箭手闕地九千七百頃渭州隴
山一帶川原陂地四千餘頃可募弓箭手二千餘人或
不願應募乞收其地入官從之六年鄜延經畧司言弓
箭手於近裏縣置田兩處立戶及四丁以上乞取一丁
為保甲一丁為弓箭手有二丁至三丁即且令充弓箭
手詔保甲願充弓箭手者聽其見役弓箭手與當丁役
毋得退就保甲陝西河東亦如之八年殿前副都指揮

使劉昌祚奏根括隴山地凡一萬九百九十頃招置弓箭手人馬凡五千二百六十二人騎賜敕書獎諭紹聖元年樞密院言熙河等路經略司奏本路弓箭手以戰功補官者遣歸所屬差使仍以其地令親屬承刺如無召人承之崇寧元年樞密院勘會陝西五路并河東自紹聖開拓以來疆土至廣遠者數百里近者不減百里罷兵以來未曾措置田多膏腴雖累降詔置弓箭手類多貧乏或至逃亡州縣鎮寨汚吏豪民冒占沃壤利不

及於平民且並緣舊疆侵占新土今遣官分往逐路提
舉措置應緣新疆土田分定腴瘠招置弓箭手推行新
降條法舊弓箭手如願出佃新疆亦仰相度施行詔湯
景仁河東路董采秦鳳路陶節夫環慶路安師文廊延
路並提舉弓箭手大觀二年詔罷提舉弓箭手四年詔
復置提舉弓箭手以武臣為之以前所置文臣皆養安
不能親詣極邊衝冒寒暑經理番地故也三年提舉河
東路弓箭手司奏本司體訪得沿邊州軍逐處招置弓

箭手多將人戶舊用工開耕之地指射剗奪其舊佃人
遂致失業且所出租僅比佃戶五分之一於公私俱不
便今欲乞應係官莊屯田已有人租佃及五年者並不
在招置弓箭手請射之限其河東路察訪司初不以邊
防民兵為重姑息佃戶致有此弊欲乞應熙寧八年以
前人戶租佃官田並先取問佃人如願投刺弓箭手每
出一丁許依條給見佃田二頃五十畝充人馬地若不
願充弓箭手及出外尚有請占不盡地土即拘收入官

從之提舉熙河蘭湟路弓箭手何灌申漢人買田尚多
比緣打量其人亦不自安首陳已及一千餘頃若招弓
箭手即可得五百人若納稅租依條每畝三斗五升草
二束一歲之間亦可以得米三萬五千石草二十萬束
今相度欲乞將漢人買置到蕃部土田願為弓箭手者
兩頃已上刺一名四頃已上刺兩名如願者依條立定
租稅輸納其巧為影占者重為禁止從之七年三月詔
熙河鄯湟自開拓已來疆土雖廣而地利悉歸屬羌官

兵吏祿仰給縣官不可為後計仰本路帥臣相度以錢糧茶絲或以羗人所嗜之物與之貿易田土田土既多即招置弓箭手入耕出戰以固邊圉靖康元年臣僚上言陝西恃弓箭手為國藩籬舊隸帥府比年始置提舉司其提舉官務多取數目以為功將舊人已給田分擘招刺新人貪賞欺蔽遂至選練不精法制浸壞乞罷提舉司復隸帥司其已分擘弓箭手田土依舊改正撥還招到新入依條別給地庶得均濟從之

河北河東陝西義勇 慶歷三年選河北河東強壯并
抄民丁湏手背為之戶三等以上置弩一當稅錢二十
三等以下官給各營於其州歲教練給俸廩犯罪斷比
廂軍下番比強壯治平元年詔陝西民除商號二州餘
悉義勇凡主戶家三丁選一年二十至五十材勇者充
以五百人為指揮置將領詳見兵制門又詔秦隴儀渭涇原
邠寧環慶鄜延十二州義勇遇召集防守日給米二升
給醬菜錢三百蓋慶歷初河北路總十八萬九千二百

三十一人河東路總七萬七千七十九人陝西路治平
初總十五萬六千八百七十三人熙寧元年樞密使呂
公弼請以河北義勇每指揮揀人材少壯事藝精强者
百人為上等手背添刺上等二字從之帝言義勇可使
分為四番出戍呂公弼曰須先省得募兵乃可議此王
安石曰計每歲募兵所死亡之數乃以義勇補之可也
陳升之欲令義勇以漸戍近州兩府共議或以為令一
月一番或以為一季一番且令近戍文彥博等又言難

使遠戍安石辯之甚力兵部上陝西河南河東義勇數
陝西路二十六郡舊籍十五萬三千四百益以環慶延
州保穀弓箭手三千八百總十五萬六千八百為指揮
三百二十一河北三十三郡舊籍十八萬九千二百今
籍十八萬六千四百為指揮四百三十而河東二十郡
自慶歷後總七萬七千為指揮一百五十九凡三路義
勇之兵總四十二萬三千五百人三年涇原經略使蔡
挺言欲以涇渭儀原四州義勇分五番三千人防秋以

八月十五日上十月罷防春以正月十五上三月罷周而復始詔從之行於諸路判延州郭達言陝西起發義勇赴緣邊戰守今後並令自齎一月糗糧折本戶稅賦若不能自備則就所發州軍預請一月口食從之知永興軍司馬光極言分義勇四番於沿邊屯守以為挑敵勞人虛費糧餉於是永興一路獨得免六年詔永興軍河中府陝解同華鄜延丹坊邠寧環耀十五州軍各依元刺義勇外商號保安軍並止團成保甲八年諸路義

勇總二十四萬七千五百人元豐四年蒲宗孟言乞開封府五路義勇並改為保甲自此以次行於諸路義勇寢銷皆聯為保甲云

陝西護塞慶歷元年募土人熟山川道路曉蕃情善騎射者湮臂充二百人為指揮自備戎械就鄉閭習武技季一集州閱教無事放營農月給鹽茗有警召集防守即廩給之母出本路

麟州義軍與弓箭手略同而不給田康定元年詔麟

州府募歸業人增補俾耕本戶故地免其租稅

荆湖義軍土丁弩手 不見叛置之始北路辰澧二州
南路全邵道永四州皆置蓋溪峒諸蠻種類滋熾保據
巖險或叛或服控制陬落須其土人故置是軍皆選自
戶籍蠲免徭賦番戍寨柵大率安其土風則罕撓瘴毒
知其區落則可制狡獪其校長則有都指揮使副都指
揮使指揮使副指揮使都頭副都頭軍頭頭目採斫招
安頭目十將節級皆叙功遷補使相綜領施之西南實

代王師有禦侮之備而無饋餉之勞其後荆南歸峽鼎
郴衡桂陽亦置慶歷二年北路總萬九千四百人南路
總五千一百五十八人番戍諸寨或以歲或以季或以
月上番人給口糧有功遷補自都副使指揮使歲給錦
袍月給食錢指揮使副指揮使給紫大綾綿袍都頭以
上率有廩給熙寧初籍其數凡一萬五千人六年諸路
行保甲司農寺請令全邵二州土丁弩手共為保甲立
保正保長以統之元祐七年湖南路鈐轄謝麟請以邵

陽武岡新化等縣中等以下戶選充土丁弩手與免科役七年一替排補將級不拘替放年分作兩番邊寨防拓不得募人如有私役依私役禁軍敕論從之政和七年募湖北辰沅澧州土丁為刀弩手授以閑山散居邊境教以武藝其隸於籍者至九千餘人靖康初全軍調發前往河東援太原陷於虜存者僅千五百人建炎二年罷之紹興六年命招募以三千五百人為額淳熙三年敕募人教閱犒賜如禁軍例然刀弩手舊田諸郡已

收為省計有司雖募人為之往往無田可給但虛立姓名以應命又土人多憚點集甚患苦之李燾張栻力言其不便栻請用見數委提刑躬行點檢候有田設官始令招足元額燾復言如此則提舉刀弩一司又當復置而欲冒賞者必至橫沒民田為害滋大不若以見點數為準專委守臣寬以歲月令招及從之湖南鄉社舊制領以鄉豪有彈壓緝捕等名大者統數百家小者亦二三百家由潭連道英韶郴桂皆置淳熙七年言者奏鄉

社之擾請罷之帥臣辛棄疾言鄉社皆處深山窮谷中忠實狡詐色色有之不可盡罷欲擇其首領使大者不過五十家小者減半屬之縣尉從之

夔州路義軍土丁壯丁 州縣籍稅戶充或自溪峒歸投分隸邊寨習山川道路遇蠻入寇遣使覈討官軍但據嶮策應之其校長之名隨州縣補置月給衣糧犒賜有差有功者以次遷熙寧初詔除防托巡警外敢擅差役及科配和催並科違制之罪

施黔思三州義軍土丁 總六千三百六十五人隸都
巡檢司施州諸寨有義軍指揮使把截將寨并土丁總
一千二百八十一人壯丁六百六十九人又有兩路巡
防殿侍兼義軍都指揮使指揮使都頭十將押番寨將
黔州諸寨有義軍正副指揮使兵馬使都頭寨將把截
將并壯丁總千六百二十五人思州洪杜彭水縣有義
軍指揮使巡檢將寨糧理旁頭把截部轄壯丁總千四
百二十二人

渝州懷化軍漆州江津巴縣巡遏將 皆州縣調補其
戶下率有子弟客丁遇有寇警一切責辦主戶治平元
年詔懷化軍漆州巡遏把截將歲支料鹽襖子須三年
其地內無寇警乃支三年一比如有失縱或致撩寇五
次即罷給有勞者增之仍使分地戍守

涪州義軍 舊無之嘉祐中始補賓化縣夷人為義軍
正都頭副把截將小節級其請給節制大率如渝漆

廣南西路土丁 嘉祐七年籍稅戶應常役外五丁點

一為之凡得三萬九千八百人分隊伍行陣習槍鏢牌
州縣以時按閱紹興八年廣西經略胡舜陟言數十年
來武備弛廢土丁老弱混雜嘗乞只就鄉村教習更不
分番入州縣已得朝旨於諸縣逐鄉置教場自十一月
起教至次年正月罷教輪差縣官檢點今以一路人數
計之土丁五萬一千八百九十六人保丁七萬六千一
百五十九人若帥臣不變易更一二年必為精兵詔依
乾道二年詔土丁邕宜雅等州籍定姓名年甲年五十

則汰別選戶丁替

保丁則每戶一名土丁則父兄弟皆在其數後以州縣因教閱之時拘留

重役下

令禁止

廣南東路槍手

嘉祐六年廣惠梅潮循五州以戶籍

置三等以上免身役四等以下免戶役歲以十月集縣教閱治平元年詔有闕即招補招補不足選本鄉有武技者充熙寧元年詔廣州槍手十之三教弓弩手是歲會六郡槍手為指揮四十一總一萬四千七百有奇六年詔戶四等以上有丁三者以一為保甲每百人為一

都五都為一指揮輪番教閱九年兵部廣東五郡槍手
請籍主戶弟以上丁壯無過舊額一萬四千之數餘以
為保甲奏可

邕州溪峒壯丁 治平二年廣西安撫司集左右兩江
四十五溪峒知州峒將各占隣迭為救應仍籍壯丁補
校長給以旗號峒以三十人為一甲置節級五甲置都
頭十甲置指揮使五十甲置都指揮使總四萬四千五
百人以為定額各置戎械遇有寇警召集之二年一閱

察視戎械有老疾并物故名闕選少壯者填三歲一上其籍熙寧中王安石言募兵未可全罷而民兵可漸復至於二廣尤不可緩今中國募禁軍往戍南方多死陛下誠移軍職所得官十二三鼓舞百姓豪傑使趨為兵則事甚易成於是蘇軾請訓練二廣峒丁以利祿勸獎使勤於閱習從之十年樞密院請邕欽峒丁委經畧司行下訓練第為三等軍功武藝出衆為上蠲其徭役人材趨捷為中蠲其科配餘為下邊盜發則酋長相報率

族衆以捍寇元豐元年經略司請集兩江峒丁為指揮
權補將校奏可其後又增置都巡檢使兩員五年詔廣
南保申如戎瀘故事自置裹頭無办槍竹鏢排木弓刀
蒿矢習武技遇捕盜則官給器械六年廣西提點刑獄
彭次雲言邕苦瘴癘請量留兵更戍用峒丁以季月番
上給禁軍錢糧詔從之議者謂若以代正兵恐妨農請
計戍兵三之一代以峒丁季輪二千赴邕州肄習武事
制可大觀二年八月詔熙寧團集左右江峒丁十餘萬

衆自廣以西賴以防守今又二十萬衆來歸已令依左右江例相度聞奏及所條法入熙河蘭湟秦鳳路勅施行紹興四年廣東宣諭明橐言邕州有左右江峒丁本防交趾比年點差赴桂州防托其峒官及親屬及本戶丁夫未嘗被差科率錢糧擾之無所不至乞行下經略司應峒丁土丁各仰本處防守無得調發詔依

河北弓箭社 河北舊有之熙寧三年知定州滕甫言中國夷狄之兵常患多寡不敵蓋中國兵有定數至於

平民則素不使知戰夷狄之俗人人能戰舉國皆兵此其所以多勝也今河北州縣近山谷處民間各有弓箭社及獵射人習慣便利與夷人無異欲乞下本道逐州縣並令募諸色公人及城郭鄉村百姓有武勇願習弓箭者自為之社每歲之春長吏就閱試之北人勁悍緩急可用從之元祐八年知定州蘇軾上言欲將河北弓箭社照河東陝西弓箭手例官給田以供車馬事

詳見兵制

門宣和七年臣僚言京東西兩路昨因提刑梁揚祖奏

請勸誘民戶充弓箭社原立法之意不過使鄉民自願入社者閱習武備為禦賊之具爾奈何邀功生事之人唯以入社之民衆多為功厚誣朝廷而斂怨於民督責州縣急於星火取五等之籍甲乙而次之家至戶到追胥迫脅悉驅之入社更無免者法始行於西路西路既已冒受厚賞於是東路憲司前後論列誕謾滋甚近者東路之奏以數計至二十四萬一千七百人又奏武藝優長一十一萬六千餘人且云比之西路僅多一倍陞

下灼知其不然雖命帥臣與廉訪使者覈實彼安肯以實聞乎今東路憲司官屬與登淄兩州當職官坐增秩者幾二十人而縣令佐不及焉不知出入阡陌間勸誘者誰歟此其誕謾可知矣審如所奏有被甲執兵之民數十萬按閱有方則山東之寇何至累月淹時未見殄滅哉則其所奏二十四萬與十一萬殆虛有名不足以捍賊明矣大抵因緣追擾民不堪其勞則老弱轉徙道路強壯起為盜賊此亦致寇之一端也近者仰賴陛下

遣將出師授以方略又命近臣持詔撫諭至於發內庫之藏轉淮甸之粟以賑給之寬免其稅租蕩宥其罪戾丁寧纖悉罔不曲盡方將歸伏田畝以為遷善遠罪之民詎可以其所甚病擾之邪且私家有兵器在律之禁甚嚴三路保伍之法雖於農隙以講武事然猶事畢則兵器藏於官府今弓箭社一切兵器民皆自藏於家不幾於借寇也哉望陛下斷自聖心罷京東弓箭社之名所藏兵器悉送之官使民得免非時追呼迫脅之擾以

安其生應兩路緣弓箭社推恩者並追奪改正首議之人重賜黜責後來奏請誕謾亦乞特賜施行庶幾羣下悚懼不敢妄進曲說以肆其姦實今日之先務也詔並依奏梁揚祖落職其禁兵器令安撫司並拘入官弓箭社人依已降指揮放散建炎元年六月河北京東巡社鄉民結集以禦金人詔以忠義巡社為名隸安撫司後樞密院立法募鄉民為之以忠義強壯為名每十人為一甲設甲長隊長部長社長都正於鄉井便處劄寨以

時按試不得非時追擾

川陝土丁 熙寧七年經制瀘江夷事熊本募土丁五千入夷界捕戮水路大小四十六村蕩平其地二百四十里募民墾耕聯其屬夷以為保甲政和六年瀘南安撫使孫義叟奏邊民冒法買夷人田依法盡拘入官招置土丁子弟見招到二千四百餘人欲令番上從之福建路槍仗手 元豐元年福建轉運使蹇周輔廖恩為盜以槍仗手捕殺乃有冒為槍仗手之人乘賊勢驚

擾村落患甚於恩詔犯者刺配仍額定槍仗手人數以
歲閱集依保甲法隸提刑司有保長保正具教閱捕盜
食直等令總一萬二百人有奇聽自置兵械寄於官遇
捕盜乃給元祐元年御史上官均言槍仗手老弱不閑
武技者十七八監司按試多克期呼集既至往往代名
充數冒賞徒有呼集之勞而無校試之實如未欲罷乞
重行考覈靖康元年臣僚言天下步兵之精無如福建
槍仗手出入輕捷馭得其術一可當十乞選官前去召

募從之建炎三年六月詔令福建初募槍仗手五十人專一備東西捕盜每百人差部轄一名有功先次借補進武校尉紹興五年福建帥司乞將福建繫籍槍仗手並行蠲放從之

江西槍仗手 熙寧七年詔籍虔汀漳三州鄉丁槍手以制置盜賊司言三州壤界嶺外民喜販鹽且為盜非土人不能制故也元豐二年詔虔州槍仗手五百三十六人撫州建昌軍鄉丁開軍槍仗手各千七百七十八

人為定額每歲農隙按閱武藝以備姦盜七年兵部言
江西槍仗手以八千三十五人為額

河東陝西勇敢効用亦募兵也涇原路經略使蔡挺
言涇原勇敢三百四十四人季一點閱校其騎射能否
陞除補有功者以為隊長募極邊塞博軍子嘗歷戰陣
者補其闕益募熟戶蕃部以為蕃勇敢凡一千三百八
十八人騎一千一百九十四匹詔諸路如挺請施行之
六年樞密院言勇敢効用皆以材武應募從軍廩賜既

優戰馬戎械之具皆出公上平時又得以家居以勞効
賞者凡四補而至借職校弓箭手減十資淹速相遠甚
非朝廷第功均賞之意請自今河東廊延秦鳳環慶熙
河路各以三百涇原路五百為額第一等步射弓一石
一斗馬射弓九斗俸千錢第二等以下遞減一斗俸七
百至五百季首閱試於經畧司射親及野戰中者有賞
全不中者削其俸次季又不中者罷之戰有功者以八
等定賞一給公據二以為隊長三守關中將四軍將五

殿侍六三班借差七差使八借職其弓箭手有功亦以
八等定賞一押官丞局二將虞將十將三副兵馬使軍
使四副指揮使五都虞候六都指揮使七三班差使八
借職即以闕排連者次遷如今詔可仍頒之諸路

蕃兵者塞下內屬諸部落團結以為籬籬之兵也西北
邊羌戎種落不相統一保寨者謂之熟戶餘謂之生戶
陝西則秦鳳涇原環慶鄜延河東則石隰鄜府其大首
領為都軍主司帳已上者為軍主其次為副軍主又有

以功次補者其官職俸給有差康定二年陝西體量安撫使王堯臣言涇原路熟戶萬四百七十餘帳帳之首領各有職名曹瑋帥本路威令明著常用之平西羌其後邊備稍懈守將惟務姑息寢成驕黠自元昊反戎軍及渭州山外皆被侵擾近界熟戶亦遭殺虜蕃族之情最重酬賽因此釁隙激怒之可復得其用請遣人募首領願効用者籍姓名并士馬之數及千人聽自推有謀勇者一人授以班行及巡檢之名使將領出境破蕩生

戶所獲財畜官勿檢覈得首級及傷者給以賞物仍依
本族職名補遷及增俸錢詔如所請慶歷二年知青澗
城种世衡奏募蕃兵五千湮右虎口為忠勇字隸折馬
山族上封者因請募屬戶給禁廩賜使戍邊悉罷正兵
下其章四路安撫使議環慶路范仲淹上言熟戶戀土
田護老弱牛羊遇賊力鬪可以藩蔽漢戶而不可倚為
正兵大率蕃情黠詐畏強凌弱常有以制之則服從可
用如去正兵必至驕蹇又令蕃部都虞候至副兵馬使

俸錢止七百至三百悉無衣廩若長行遽得禁軍奉給
則蕃官必生微望況歲罕見敵何用長與廩給且錢入
熟戶部族資市羊馬青鹽轉入河西亦非策也以臣所
見不若遇有警旋以金帛募勇猛禦賊為便議遂格治
平二年詔陝西四路駐泊兵馬鈐轄梁實等各管勾本
路蕃部團結強人壯馬預為經畫寇至則令老弱各有
保存之所仍諭實等往來族帳受其牒訴伸其屈抑察
其反側者羈縻之勿令猜阻以萌邊釁實等至蕃部召

首領稱詔犒勞賞以銀帛城寨兵馬計族望大小分隊
伍給旗幟使合繕堡壘人置器甲以備調發仍約不如
令下不集押隊首領以軍法從事 秦鳳路寨十三強

人四萬一千一百九十四壯馬七千九百九十一 廊

延路軍城堡寨十蕃兵一萬四千五百九十五官馬二
千三百八十二強人六千五百四十八壯馬八百十

涇原路鎮寨城堡二十一強人一萬二千四百六十六

壯馬四千五百八十六為百十甲總五百五隊 環慶

路鎮寨二十八強人三萬一千七百二十三壯馬三千
四百九十五總一千一百八十二隊 治平四年郭達
言秦州青鷄川蕃部願獻地請於川南牟谷口置城堡
寨募弓箭手以通秦州德順二州之援斷賊入寇之路
閏三月收原州九寨番官三百八十一人總二百二十
九族七千七百三十六帳蕃兵萬人馬千匹是歲罷四
路內臣主蕃部者選逐路陞朝使臣諳練蕃情者為之
熙寧元年議者謂熟羌乃唐設三使所統之党項也自

遷賊不臣種落叛散分寓南北為首領者父死子繼兄死弟襲家無正親則又推其旁屬之强者以為族首多或數百雖族首年幼第其本門中婦女之令亦皆信服故國家因其族以為法其大首領上自刺史下至殿侍並補本族巡檢次首領補軍主指揮使下至十將第受廩給歲久客族帳混淆莫紀康定中嘗遣將偕籍之今踰三十年主家或以累降失其先職族首名品而客戶或以功使臣軍班超處主家之上軍興調發有司惟視

職名使號令其部曲而衆心以非主家莫肯為用請自
今蕃官身歿秩高者子孫如例降等以為本族巡檢其
旁邊能捍賊者給俸遠邊者如舊制限以歲月其已降
等或三班差使殿侍身歿無等可降者其子孫不降充
軍主指揮使者即以為殿侍如此則本族蕃官名品常
在或其部曲立功當任官者非正親母得為本族巡檢
止增其俸其軍主至十將祖父有族帳兵騎者子孫即
承其舊限年受廩給極邊及立功者不用此令如此則

熟羌之心皆知異日子孫不失舊職世為我用矣從之
五年王韶初納沿邊蕃部自洮河武勝軍以西至蘭州
馬御山洮岷巖疊等州凡補蕃官首領九百三十二人
首領給珍錢蕃官給俸者四百七十三人月計費錢四
百八十餘緡得正兵三萬族帳數千時詔拓熙河地千
二百里招附三十餘萬之衆漸推之法變其夷族然韶
所募勇敢士九百餘人耕田百頃坊三十餘所部蕃既
得為漢而其俗又賤土貴貨漢人得以貨與蕃部易田

蕃人得貨兩得所欲而田疇墾貨殖通番漢為一其勢
易以調御請如諸路以錢借助收息又捐百餘萬緡養
馬於番部且什伍其人獎勸以武藝使其人民富足士
馬強盛奮而使之則所向可有功番部初附如洪荒之
人唯我所御而已七年詔言討平河州叛蕃開土甚廣
已置弓箭手又以其餘地募番兵弓箭手每寨三指揮
或至五指揮每指揮二百五十人人給田百畝以次蕃
官二百畝大蕃官三百畝仍募漢弓箭手為隊長稍衆

則補將校暨蕃官同主部族之事其蕃弓箭手並刺蕃兵字於左耳以防漢兵之盜殺而效首者詔如其請八年五月詔季承之參定蕃兵法十一月詔選陝西蕃兵丁壯戶九丁以上取五六取四五取三三取二二取一並年二十以上涅手背毋過五丁每十人置十將一五十人置副兵馬使一百人置軍使一副兵馬使一二百人置軍使一副兵馬使三三百人置副指揮使一軍使二副兵馬使三四百人加軍使一副兵馬使一五百人

又加指揮使一副兵馬使一過五百人每百人加軍使一副兵馬使一即一族三十人以上亦置副兵馬使一不及二十人止置十將月受俸仍增給錢指揮使二千五百至十將有差熙河等路制置使李憲言漢蕃兵騎雜為一軍語言不通居處飲食悉不便利昔李靖以蕃落自為一法請釐蕃漢為兩軍相參號令軍事從之元祐元年臣僚言舊制諸路蕃官不問官職高卑例在漢官之下所以尊中國制夷狄也行之既久今忽更制蕃

漢官非相統轄者並依官序相壓即邊上使臣及京職官當蕃官之下者十有八九非人情所堪且夷狄亮驕豈可輒啟宜悉依舊制並列漢臣之下從之

神宗熙寧二年詔諸揀不任禁軍者降充廂軍不任廂

軍者免為民

詳見兵制門

七年分天下兵為九十二將各總其兵

詳見兵制門

樞密院言京城役兵不足歲取於諸路而江淮兵每饑凍道斃相屬略計歲所用外軍七千人調發增給不貲

請募東西八作司壯役指揮諸司雜犯罪人情輕者並配隸以次補雜役効役代諸路役兵從之又言諸路廂軍名額猥多自騎射至牢城其名凡二百二十三其間因事募人團立新額或因工作權酤水陸運送通道山險橋梁郵傳馬牧堤防堰埭若此者事在而名未可廢及剩員直牢城皆得有犯配隸之人壯城專治城隍不給他役別為一軍而教閱廂軍亦自為額請以諸路不教閱廂軍併為一額餘從省廢其移併如禁軍法奏可

遂下諸路轉運司以州大小高下為序始自某州為第一指揮差次至某州凡為若干指揮每指揮毋過五百人

自五代無政凡國之役皆調於民民以勞敝宋有天下悉役廂軍凡役作工徒營繕民無與焉故天下民力全固至今遵之

元豐四年詔陞南京青鄆曹齊濮州有馬教閱廂軍及真定北寨勁勇環州下蕃落未排定指揮並為禁軍

河北路騎軍之額自騎射而下十有一步軍之額自奉化而下二十有六並改號曰崇勝凡為一百一十二指揮總二萬九千二百七十人

河東路騎軍之額自威邊而下二步軍之額自左衛而下十有八並改號曰雄猛凡為五十二指揮總一萬二千四百一十人

陝西路騎軍之額自騎射而下有六步軍之額自左衛而下二十有九並改號曰保寧凡為一百一十一指揮

總二萬五百六十二人

京東路騎軍之額自騎射而下有三步軍之額自左衛而下十有七並改號曰奉化凡為五十四指揮總一萬四千七百五十人

京西路騎軍之額自騎射而下六步軍之額自奉化而下二十有五並改號曰勁武凡為四十五指揮總一萬五千一百五十人

淮南路騎軍之額自威邊而下六步軍之額自左衛而

下二十有七並改號曰寧淮凡為一百二指揮總四萬一千二百八十五人

兩浙路步軍之額自捍江而下三並改號曰崇節凡為五十一指揮總一萬九千人

江南路騎軍之額揀中騎射一步軍之額自効勇而下五並改號曰効勇凡為五十三指揮總一萬六千六百五十人

荆湖路騎軍之額自騎射而下三步軍之額自左衛而

下二十並改號曰宣節凡為四十四指揮總一萬一千三百人

福建路步軍之額自水軍而下三並號曰保節凡為三十三指揮總一萬一千一百五十人

廣南路騎軍之額自靜山而下二步軍之額自水軍而下十並改號曰清化凡為八十二指揮總一萬二千七百人

四川路步軍之額自開遠而下十並改號曰克寧凡為

一百一十一指揮總二萬三千四百人

元符元年九月詔罪人應配五百里以上皆配陝西河東充廂軍

曾布白帝曰此漢徙罪人以實邊之遺法也

政和四年中衛大夫童師敏奏竊見東南州郡例闕廂軍凡有役使並是逐急和僱於理未便欲望指揮諸郡守臣并提刑司措置招填數足庶免逐急僱人之費從之

高宗紹興二年詔戍兵於本州知通依階級法

言者請令後統兵官經由州縣如屯駐法從之

中興後熙寧所置將兵在東南者纔十三將淮南東路
第一淮西路第二兩浙西路第三浙東路第四江南東
路第五江西路第六荆湖北路第七湖南路第八而全
邵永三州準備廣西應援第九福建路第十廣南東路
第十一廣西路桂州第十二邕州第十三慶元令諸廂

軍隸尚書兵部因事立名者隨事所屬

如清務隸戶部
壯城作院錢監

隸工部河清橋道廣濟隸水部青石塲採造務司竹監隸虞部之類

建炎以來朝野雜記四川廂軍二萬九百七十二人

禁軍二萬七千九百九十二人土兵一千八百三十

六人

已上係官軍

義士二萬六百五十二人

興元府興洋州大安軍

保勝

金

忠勝

文

忠勇軍

階成西和鳳

弓箭手

西和

良家子

共六千三百九十九人

已上係民兵

保甲五萬五千一百

七十人

關外四州

凡民兵優恤之制義志忠勝軍免家業

錢百五十千至二百千止

一家雙名則更免五十千

忠勇軍則階

州免家業錢

馬軍二百三十千
步軍一百七十千

成州免稅賦

馬軍二
頃半步

軍二頃西和鳳州皆免租

馬軍六石九斗八升
步軍五石三斗六升

其更戍

則月給糧人七斗有半

惟忠勇
軍更戍

保勝軍亦免家業

自五

十至二十
十止弓箭手則給官田

馬軍二頃半
步軍二頃

此其大較也

大率西蜀大軍廂禁軍民兵保甲總二十三萬三百

六十四人仰給縣官者十四萬餘人而民兵保甲不

仰給者八萬餘人此乾道之籍也淳熙以後土丁亦

有仰給者別出於後

成都禁軍謂之飛山軍驕懦最
甚紹興末王時亨為制帥取會

四川禁軍之籍二萬九千餘人除利夔兩路禁軍分
戍沿邊城寨外東西路一萬九千人內揀到五千五
百七十三人謂之盛強將兵時吳璘兵少遂調四
十人往仙人關守禦三十二年秋也事平復罷

土豪 建炎四年臣僚言朝廷近起鄉兵防江召募土
豪乞責守臣止使各保鄉井詔依仍詔各聽本州縣守
令節制將來防托無虞當議推恩紹興四年十一月密
院言浙西沿江見在土豪民兵無補事功詔存留強壯
餘並放散

八字軍河北土人也 建炎初王彥為河北制置使聚

兵大行山皆湮其面曰誓殺金人不負趙王故號八字
軍二年上命范瓊往山東擊敵瓊請彥與俱已而彥以
疾留真州瓊并将其兵瓊誅復以兵還彥時彥為御營
都統制既而彥以八字軍隨張浚宣撫川陝六年彥召
為行營前護副軍都統制以所部八字軍萬人赴行在
與馬帥解潛不叶兩軍交關中外洶洶詔兩罷之以劉
錡領司馬軍事并王解兩軍屬之十年錡為東京副留
守將八字軍以行至順昌會金人烏珠入侵錡大敗其

師十一年復還姑孰七月錡罷為荆南帥其衆復還臨安府今侍衛馬軍皆其子孫也

義兵 紹興十年密院言沿淮制使劉錡申陳蔡兩州團結鄉兵保聚委是忠義今以朱昌臧成充義兵將領團集詔依三十一年淮南官莊秉義郎陳順忠訓郎車定方糾集義兵九百人自備器械不支官俸可以守禦詔各轉官資乾道四年參政陳俊卿言兩淮民兵乞令諸州以戶口多寡三丁取強壯一名籍為義兵於農隙

授之弓弩教之戰陣給以錢糧詔依

夔路義兵 紹興末帥臣李師顏於夔州三縣保甲中

選置立七資職以分上下邑軍名團結初議摘禁軍時

梁山守臣言夔環萬山民勇過於正軍乃募鄉兵元額

三千四百餘人師顏既去軍無紀律大抵夔路恭涪忠

萬四州皆有義軍額或數千而施黔有勇敢及思珍田

楊等家丁悉驍勇皆鄉兵云

義士 紹興元年興元府帥王庶以富平兵敗後籍興

元諸縣良家子弟兩丁取一與免下戶物力錢二百千
每二十人為一隊號曰義士以縣令為軍正尉副之守
臣提舉不半年有兵數萬教閱有方則令尉改秩張浚
言於朝其後合梁洋大安三郡至萬三千人軍勢遂張
三十一年戰於大散關驅在軍前為敵人所敗僅存六
千人乾道元年悉罷之除籍放散其衆三年四川宣撫
虞允文言興洋大安軍見管義士二萬六千一百四十
人訓練有功效乞移皇甫倜於興元軍專一教閱從

之

民兵 建炎三年御營參議官柳約奉聖旨沿江地分
須是民兵每五十人為一隊有長副以田括丁一户抽
一丁五丁抽二丁官戶不免輕重不等科擾太重乞量
立刑賞委官檢視如有老弱則令舉劾詔依六年詔立
兩淮民兵賞格淳熙十四年九月令湖北京西措置民
兵三丁取一

弓箭手 建炎元年赦應諸路蕃漢弓箭手合該承襲

人因差使出入事故陳乞違限限百日自陳承襲紹興九年京城副留守郭仲荀乞將京城外閑地依陝西沿邊例招弓箭手種蒔詔依十年詔據見田招刺不拘舊額

黎雅州土丁 集沿邊農人火甲戶為之蓋唐雄邊子弟之遺法舊無行陣軍伍但以甲頭總之祖宗以來弛酒禁免征役凡優恤之者無所不用其至黎州自乾道七年邊釁之後始置寨將押隊旗頭之類略寓軍制每

歲農隙時官給口食教之武事舊制凡千人淳熙三年

祿粹父直閣為守請倍其數又以等級籍其少壯者月

給以錢九年春言者乞下黎州別立優恤土丁之目守

臣龔總始奏以五十二人為一隊每邊二十隊計千四

十人三邊共三千一百二十人置教場四十九所是時

三邊土丁之籍實為五千一百二十六人而東南邊防托

部一千七百八十七西南邊防托吐蕃青羌等族一千二百九

十一正西邊防托五部落一千九百四十八凡上等一千五

百九十九人歲費錢二萬八千三百七十有六緡

每人月給

一千遇閏年歲總計四萬一千五百七十四緡

而戍兵不與議者謂土丁粗有

軍律統紀且熟知夷人情偽地形險阻其實可用為鄉導守邊鎮言者乃乞將黎雅二州依利路義士法措置留丞相為制置使遣屬官馮傳之往二州共議各州選二千人上等六百為點集之丁月給錢三千五百次等千四百為居守之丁月給錢千兩郡歲費錢共八萬七千六百緡而教閱之費不與焉時淳熙十年矣嘉定土

丁者惟峨眉犍為二縣有焉自熙豐以來峨眉八寨千
四百八十人犍為五寨之籍二百七十五官既無以給
之而又多為寨官所剋紹興十三年有言於都鈐轄
司者謂宜教試而優恤之時方諱兵迄不能用也威茂
州亦有土丁各州二百威州之丁月給米三斗驍捷可
用夷人亦畏之茂州之丁半市人無月給半有為夷人
傭耕者蓋二郡皆斗入夷腹中無省地茂州每合教則
土丁悉從夷人假衣甲器械以為用事已復歸殊為文

具

把截將 紹興二十七年夔路安撫使奏南平軍夷透漏入恭州舊以土丁為把截詔帥臣相度請以清溪寨主戶逐名家業錢多少均定合置土丁二百名內選材勇為把截將依例支破請受從之

保勝 紹興六年密院言金均房三州保甲後稱保勝三州安撫柴武措置結為隊伍分成五軍詔依 二十九年開蓬州安撫王彥申保勝三千屢立戰功錢糧不

足乞依正軍破支口券從之

勇敢 紹興二年知池州葉煥申招土人充守禦勇敢
乞依禁軍請給以二十人為額從之

山水寨 紹興四年承楚泰三州各有水寨民兵合力
擊賊詔免十年租稅三十一年中丞汪澈乞存恤淮南
山水寨鄉豪各收其用隆興元年臣僚言乞行下都督
府專委兩淮守臣各括責山水寨首領姓名保明來上
量補官資專一裒集鄉兵俾之團結明立賞格一有緩

急入城守禦荆襄邊郡亦乞行下制置司依此施行詔
江淮都督府湖北京西制置司措置二年十二月十日
德音赦楚滁濠廬光州盱眙光化軍管內并揚成西和
襄陽德安府信陽高郵軍應州縣山水寨首領自備錢
糧糾集把隘或戰鬪立功仰逐州軍守臣保明申省取
旨推恩乾道五年九月辛酉兩淮徐子寅言得旨將本
路諸州山水寨民兵應三丁以上選壯丁赴州教一月
從之淳熙初子寅上其數弓一萬六千九百八十人弩

手凡一千四百二十五明年秋提舉張宗允與子寅分
路提督宗允奏每郡以土豪見任官一員統轄月增給
人三十千自十月下旬始州帥司教二月淮東五郡用
錢十六萬米三萬石淮西倣此惟光黃濠楚安豐盱眙
七郡但就本州教閱犒設錢減半

萬弩手 紹興元年沅州奏熙寧末始創營田鼎澧辰
沅靖置弓弩四千人靖康調發不存乞以閑田募民承
佃招弓弩手二千人從之八年詔淮東西湖北京西沿

江民兵萬弩手農隙教閱有武藝超越人材智勇可以服衆者本司拍試其名申省以憑覆試推恩淳熙二年淮南運判張士元言廬舒和蘄州無為軍五州民兵萬弩手教閱兩月合用錢十六萬一千餘貫乞行科降從之

壯丁民社 乾道四年知楚州劉舜謨言兩淮舊有壯丁民社乞依陝西弓箭手法並免戶下苗田兩項從之良家子 紹興四年宣撫吳玠始創興元府良家子招

兩淮關陝流寓及陣亡主兵將子弟驍武不能存立者
充月給比強弓手五十人為一隊休兵之後數月消減
乾道六年本路帥臣復招募人材及五尺二寸弓力及
九斗通者將傳習將條法練習弓馬者充有官人省司
月給米麥各一石帥司緡錢十五千無官人緡錢減三
之一依義士法隸帥司御前統兵官不得與及王剛中
為宣撫抽帳前良家子還宣撫司淳熙之初宣撫司廢
後屬帥司籍二百人歲管錢二萬四千米管四千八百

石實無所用但充雜役紹興五年二月庚子楊嗣勲申
嚴鹽計奏本府自有義士廂禁軍良家子無所損益請
罷鹽店六所而以良家子隸都統司

義勇 紹興中鄂州七縣主家戶六萬六千三十二口
三十一萬四千八百九十四而民兵之籍總為萬五千
二百有一人岳州義勇之籍四千四百九十九人四邑
保伍九百三十五甲計二萬八千五百九十三人大抵
荆鄂岳三郡率五家供一兵焉三十一年北兵逼江詔

淮漢等郡籍民為兵時荆南守續獻乃請籍民為義勇其法取於主戶之雙丁每十戶為甲五甲為團甲皆有長擇邑豪為總首歲於農隙教以武藝糧從官給初乾道間舉荆南七州之籍主客佃戶凡四萬二千餘戶計十萬餘丁除當差役人外得義勇八千四百十九人四年荆湖安撫王炎言荆湖義勇團結教集使之自備食用必不能辦乞截留本所苗米萬四千石并漕司應副錢二萬緡仍從都統司假甲三千弓矢旗幟官為造給

旨從之六年二月辛亥帥司劉珙言荆南湖北兩路民兵訪問諸郡起籍民兵有上三等戶取義勇一人亦有四等五等戶取一家產多者可以枝梧少者往往棄產逃走乞充義勇者並免科役及身丁口四等戶仍差充保正長五等戶又免三分稅役每七十五人為一隊遇教閱日以營屯田之穀供其費奏可仍以甲萬副與之是年九月權知荆門馮忠嘉奏本軍所教義勇三千五百四十八人教閱各一月乞添展教之三月詔令劉珙

相度申省七年正月馮忠嘉又教閱本軍義勇因舊籍增補三百人又籍戶馬得四百匹分為六隊孝宗大喜詔總領所歲以馬料千石給之仍擢忠嘉直秘閣淳熙初張栻為帥遵修劉珙之法義勇增多至萬五百人分為五軍軍分五部栻既去教法浸弛十一年冬趙雄為帥舉行其政增三百人通舊為萬三千八百人大抵湖北諸郡皆有義勇信陽有義勇又有義士惟澧州石門慈利不置籍紹興末守臣亦籍之章穎帥湖北時又乞

義勇之應差保正者以家業錢多寡為限限外之數與官戶編戶輪差從之

忠勇 淳熙五年四川制使胡元質言關外西和階成鳳四州所聚民兵謂之忠勇皆以土兵為之向來虞允文團結四川忠勇軍計二千九十四人其後不能增募乞令四川守臣添募仍立賞格詔每州各先募五百人鎮淮 初淮南運司招募邊民號鎮淮軍多至十萬錢米月給視効用惟不黥涅久之廩給不足公肆劫掠嘉

定初江淮制置邱密恐其生變乃以分隸諸州聽守臣
節制續又奏淮東人數少令帥漕選汰歸農外僅存八
十餘人其半以充効用又補鎮江大軍與武鋒軍闕額
淮西六萬餘人委官揀到二萬六千餘人充御前定武
軍額分為六軍各置統制自是月省錢二十八萬緡米
三萬四千石而定武亦成軍伍淮西賴其力居多

忠義民兵 紹興二十八年福州帥臣沈調言諸縣舊
有忠義社隨鄉多寡屯結推豪右衆畏服者為長別量

置槍仗器甲盜由是息民賴之後官司科率騷擾遂失
本意令守臣覺察憲司舉職旨從其請開禧用兵淮襄
忠義民兵有籍於官者甚衆歲約用百六十緡以養一
兵及和議再成始汰遣時帥臣邱宗先已汰鎮淮軍五
六萬何澹繼為制帥始盡放遣澹言本司近放散廬濠
州忠義二萬五百八十六人各令歸業雖費錢三十二
萬七千餘緡米六千餘石而每歲却省錢二百十三萬
米十一萬三千石有田之人預於江南經營牛種無田

之人多入城市開張店業此乃本司幹官徐剪體國任
事之力詔剪特遷一官時二年四月戊子也其年六月
辛卯京湖制置李大性言昨者大臣創招軍額團結忠
義休兵之後依舊支請糜費廩給已放散計二萬九千
二百一十五人詔獎諭繼而江淮盜起言者謂皆前日
放散之卒請罷剪攝郡追所遷官旨從之時揀汰民兵
無歸多散為盜大性乃命每郡擇豪首一人授以官兵
使之彈壓其後餘黨始皆帖然

文獻通考卷一百五十六